

11. december 2018

Inatsisartut suleriaasianni § 37 Imm. 1 naapertorlugu matumuuna imaattunik apeqquteqaatinik Naalackersuisunut saqqummiussivunga:

Naalackersuisumut apeqqutit:

- 1. Assersuutigalugu kangiani 20 GB 999,00 kr-qarpoq. Kitaanili illoqarfinni anginerusuni internet killeqanngitsoq 1000 kr. sinnilaaginnarlugit akeqarlutik, ilumut taamak ingerlaaseqarneq pissusissamisoorpa?**
- 2. Ukiut tamaasa Tele-Post aningaasanik millionilikkaanik sinneqartooruteqartarpoq, sinneqartoorutit atorlugit akit nunatta kangianut Internet eqqarsaatigalugu aaqqiiviginiarneqanngilaq?**
- 3. Internet nunatta kangiani siuarsaaviginissaanut Naalackersuisut iliuusissamik pilersaaruteqanngillat? Imaluunniit akit appartinneqarnissaanut periarfissat ammatinneqanngillat?**
- 4. Internetsip akia arpartinneqarsinnaava imaluunniit internet GB allisinneqarsinnaanerpa akiminut naleqqussalaarlugu? (Soorlu assersuut akigititaasoq taannaaginnarluni kisianni GB allisillugu 20GB-mit 50GB-mut?)**

(Laura Táunâjik, Inatsisartuni ilaasortaq Siumut.)

Tunngavilersuut:

Kalaallit Nunaata Kangiani (Tunumi) Internet-mi akit Kitaaniit nikingangaatsiarput. Tamanna akitigut nikinganeq Nunatta Kangianeersuunit suliffissuaateqanngittumiittumi unammilleruminaattuvoq. Assigiimmik pineqarusunneq anguneqarusunnera innuttaasunit oqariartuutigineqartuarpoq.

Internet satellit-koortoq akisoqaaq, akillu kitaanut sanilliullugu assigiinngitsumik nikinganeq annertuallaarujussuarpoq. Ukiuni makkunani internet-kut attaveqaatit atugaaleraluttuinnarfiini ineriartornikkut avaqqunneqarsinnaajunnaarnikuvoq. Nunatta kangiani pisariaqartitsineq kitaanitulli annertutigisoq Naalackersuisunit eqeersimaarfigineqarnerusariaqarpoq.

Suliffeqarfinni innuttaasunit saaffigineqartuurtuni assersuutigalugu Kommuneni, Iserit A/S, niuertarfinni, Atuarfeqarfinni, ilinniartoqarfinni, RAL-mi internet kigaappallaamik attaveqaatitigut sullissiniarsarineq kipiluttunartoq ukiuni maannamut arlaqalersuni atornerarpoq. Taamaattoqartuarnera innuttaasunit ilungersunartutut isigineqarpoq. Taamaattumik pitsannorsaataasinnaasumik Naalackersuisut nassaarnissaat pisariaqalivissimavoq.

Kissaatigaara apeqqutima ullut suliffiusut qulit iluanni akineqarnissaat.